

L'agir dal chantun sut la marella

La regenza vegn crititgada en connex cun la Repower

■ **(anr/rgd) Durant l'emprim di da la sessiun da zercladur ha il cussegl grond entschet a tractar il quint statal dal chantun Grischun. Deputadas e deputads han nizegià la chaschun per tschentar dumondas criticas a la regenza. L'entschatta da la sessiun da zercladur es stà il quint statal dal chantun Grischun en il center. Las discussiuns dentant han tractà surtut l'agir da la regenza en connex cun l'interpresa da produziun d'energia Repower.**

Augment dal chapital d'aczijs

La firma Repower frunta per il mument a temps pli grevs. Sco l'entira branscha da produziun d'energia idraulica patescha la Repower dals custs d'energia bass. Il pretsch per l'electricità è per il mument sut il custs da produziun da tala. Per consequenza han bleras interpresas d'energia en Svizra difficultads da cuntan-

scher in gudogn. «Trais quarts da la sfalsifitgaziun da la fiera d'energia resultan d'intervenziuns politicas», ha ditg cusseglier guvernativ *Mario Cavigelli* al parlament, «da questas decisiuns pateschan firmas sco la Repower.» L'energia solara e l'energia da vent vegnan per il mument subvenziunadas fitg ferm e sbassan uschia il pretsch d'energia. Cunquai che la Repower è vegnida en difficultads da liquidità dovra ella ussa nov chapital. Ella vul cuntanscher questa finamira cun dauzar il chapital d'aczijs. Novs investurs mainan a l'interpresa 150 milliuns francs chapital frestg.

Investurs dal chantun da Turitg

L'acquisiziun da chapital d'aczijs deriva dad interpresas dal chantun da Turitg. Per l'ina investischan las Ovras electricas dal chantun da Turitg (EKZ) en las ovras da produziun da la Re-



Las deputadas ed ils deputads han crititgà l'agir da la regenza en connex cun l'interpresa d'electricità Repower.

FOTO Y. BÜRKL

Quint statal cun surpli d'entradas

Il quint statal dal chantun Grischun per l'on 2015 serra cun in surpli d'entradas da 17 milliuns francs. En il preventiv eri anc vegni fatg quint cun in deficit da 55 milliuns francs. Entradas pli autas ed expensas pli bassas han manà al resultat plaschaivel. Il quint positiv resulta en emprima lingia grazia entradas da taglias pli autas che budgetadas. Las taxas da las persunas naturalas han surpassà il preventiv per 28 milliuns francs. Da l'autra vart è dentant er las expensas dal chantun stadas pli modestas che fatg quint. Latiers vegn la dubla distribuziun nunspetgada dal gudogn da la Banca Naziunala Svizra (BNS) als 26 chantuns da la

Svizra. 32 milliuns francs ha il chantun Grischun survegnì dal gudogn da la BNS. Malgrà quest resultat positiv restan las prognosas davart l'avegnir pauc bunas. Per l'avegnir spetga la regenza in pegiurament da la situaziun finanziaria. Motivs per quest fatg èn tranter auter la reduziun da la part vi da la gulivaziun da las resursas da la confederaziun, l'introducziun da la refurma da gulivaziun da finanzas en il chantun Grischun sco er l'augment tar las posiziuns da contribuziun pli grondas. En vista a la situaziun economica na fa il chantun betg quint cun entradas fiscalas pli autas che quellas dals onns precedents.

power. Tar la EKZ sa tracti d'ina interpresa da distribuziun d'electricità en las singulas chasadas. «En quest senn van las interpresas da produziun Repower e da distribuziun EKZ bain ensemble», ha ditg il chau dal departament d'energia, Mario Cavigelli. Tar l'auter investur sa tracti d'in fond gestiunà da la banca UBS. En quest fond sa participeschan passa 30 partenaris da firmas privatas fin a fonds da pensiun dal maun public. «Questas interpresas èn interessadas dad investir a lunga vista e da recaltgar ina tschertra rendita», ha ditg Cavigelli. Tenor il cusseglier guvernativ na sa tracti pia

betg d'ina vendita da chapital grischun vers Turitg, mabain d'ina nova furma da collavuraziun cun novs partenadis. Il chantun Grischun na diminuescha betg il volumen da sia participaziun a la Repower, la procentuala da las aczijs en maun dal chantun sa sbassa dentant da passa 50 pertschient a var 20 pertschient. Questa cumpart signifitga er la fermezza dal dretg da vaschar.

Tranter ils pli fervents crititgaders da l'agir da la regenza tutga il president da la citad da Cuir, *Urs Marti* (pld): «La regenza grischuna ha agì a moda speculativa ed ha pers blers raps.» Il plenum dal parlament grischun era dentant da

l'avis ch'il nov augment dal chapital d'aczijs saja in pass en la dretga direziun. Il podestà da Poschiavo, *Alessandro Della Vedova* (pcd), ha engrazià a la regenza grischuna per avoir sustegnì l'interpresa ed uschia pudì mantegnair piazzas da lavur en il Puschlav, en Surselva, en il Partenz ed a Landquart. Pli navant è cusseglier guvernativ Mario Cavigelli persvas che la nova strategia da la Repower mainia al success economic giavischà: «La nova strategia da la Repower sa concentrescha sin la produziun d'energia regenerabla e sa focusescha sin las fieras centralas en la Svizra ed en l'Italia dal nord.»